

**CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E A FUNDACIÓN FILLOS DE OURENSE (FUNDAOURENSE) DE VENEZUELA PARA A ATENCIÓN DAS NECESIDADES SOCIO-ASISTENCIAIS E SANITARIAS BÁSICAS DA CIDADANÍA GALEGA RESIDENTE EN VENEZUELA**

En Santiago de Compostela, 3 de xuño de 2025

**REUNIDOS**

Por unha banda, José González Vázquez, conselleiro de Emprego, Comercio e Emigración (en virtude do nomeamento efectuado polo decreto 44/2024, do 14 de abril), actuando en nome e representación da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa presidencia.

E por outra, José Carlos Gómez Rodríguez, presidente da Fundación Fillos de Ourense, FUNDAOURENSE de Caracas, Venezuela, en virtude das facultades que lle outorgan os estatutos da entidade.

As partes comparecentes recoñécense mutuamente plena lexitimación, capacidade e representación, para a sinatura do presente convenio de colaboración e, para estes efectos

**EXPOÑEN**

**Primeiro.-** A Consellería de Emprego, Comercio e Emigración é o departamento da Xunta de Galicia ao que lle corresponde, entre outras, a competencia das relacións e o apoio as persoas e ás comunidades galegas do exterior, así como o fomento e a promoción da súa actividade e funcionamento, tal e como se recolle no artigo 1.c) do Decreto 147/2024, do 20 de maio, polo que se establece a súa estrutura orgánica.

**Segundo.-** O artigo 49 do decreto 147/2024, do 20 de maio, establece que a Secretaría Xeral da Emigración é o órgano superior da Administración xeral da Comunidade Autónoma de Galicia, no ámbito da emigración e do retorno, ao que lle corresponden, entre outras, as competencias recollidas na Lei 7/2013, do 13 de xuño, da galeguidade; en particular, son competencias desta secretaría xeral as relacións coas comunidades galegas no exterior, así como o fomento e a promoción da súa actividade e funcionamento.


**Terceiro.-** De acordo co citado decreto 147/2024, do 20 de maio, a Secretaría Xeral da Emigración xestiona diversos programas tendentes á mellora da calidade de vida das persoas galegas residentes fóra de Galicia que executa a través da estrutura das entidades galegas do exterior, polo que procura contribuír á conservación, fomento e promoción do seu patrimonio.

**Cuarto.-** A Fundación Fillos de Ourense, en diante, FUNDAOURENSE, é unha entidade xurídica civil sen fin de lucro, de carácter esencialmente benéfico, médico, de asistencia e protección social, radicada en Caracas, que exerce a súa actividade en

todo o territorio da República Bolivariana de Venezuela, e ten como obxectivos primordiais, entre outros, a protección á infancia, ás persoas anciás e a solución de problemas sociais.

Na actualidade esta fundación está a desenvolver un importante labor socio-asistencial orientado á atención a persoas en situacións extremas de marxinação, de pobreza ou de abandono, salientando a busca, a través dun grupo de voluntariado, de persoas de orixe galega que poden atoparse nesa situación, tanto na rúa coma en institucións públicas, hospitais, residencias, fogares, etc., ás que lles presta axuda alimenticia, produtos de hixiene, consulta médica, medicinas, roupa ou simplemente compañía, no caso de persoas maiores con falta de protección familiar.

**Quinto.-** En Venezuela existe un número moi importante de persoas emigrantes españolas de orixe galega con necesidades urxentes de atención non cubertas, en especial persoas maiores ou con falta de ingresos, que precisan da atención da Xunta de Galicia para acadar unhas condicións de vida dignas, dadas as súas especiais circunstancias e a situación social e política que vive o país.



**Sexto.-** A Consellería de Emprego, Comercio e Emigración estima que é necesario establecer unha colaboración con FUNDAOURENSE co obxecto de contribuír a prestarlle servizos de residencia e/ou de atención asistencial de urxencia ás persoas galegas residentes en Venezuela que non poden afrontar o custo das prestacións que precisan por razóns de exclusión social, falta de ingresos ou dependencia e ás que non se pode chegar a través doutros mecanismos de colaboración, xa que a entidade conta coa infraestrutura suficiente e está disposta a prestar este servizo.

**Sétimo.-** A Consellería de Emprego, Comercio e Emigración considera que esta entidade é a institución idónea para o outorgamento desta axuda de carácter singular e excepcional, que non se enmarca dentro dunha actuación xeneralizada de axudas para este tipo de actividades, ao non ser posible promover a concorrència pública, ao abeiro do disposto no artigo 19.4 c) da Lei 9/2007, do 13 de xuño, de subvencións de Galicia, por ser a única destas características.

O interese público de colaboración no desenvolvemento desta actuación radica na pretensión de mellorar a saúde, o benestar social e a calidade de vida das persoas emigrantes galegas residentes en Venezuela que, por cuestións de idade e/ou circunstancias socio-familiares, contén con ingresos mínimos e non poidan afrontar o custo das prestacións que precisan.

Por todo o exposto, e tendo en conta a sintonía de obxectivos e a complementariedade dos mecanismos concorrentes para a súa consecución, as partes asinantes formalizan este convenio de colaboración, que recolle as seguintes



## CLÁUSULAS

### Primeira.- *Obxecto*

Este convenio ten por obxecto establecer o marco de colaboración entre as entidades asinantes co fin de contribuír ao financiamento dos servizos de residencia e/ou de atención asistencial e/ou sanitaria de urxencia ás persoas de orixe galega residentes en Venezuela que, por razóns de idade, marxinação, carencia ou de dependencia, se

atopan en situación de necesidade e ás que non se pode chegar a través doutros mecanismos de colaboración.

### **Segunda.- Persoas beneficiarias**

Terán dereito á asistencia á que se refire este convenio as persoas que se atopen en calquera dos seguintes supostos:

1. Españolas de orixe galega, residentes legalmente en Venezuela, que sexan beneficiarias de pensións asistenciais por anciandade, ao abeiro do establecido no Real decreto 8/2008, do 11 de xaneiro, polo que se regula a prestación por razón de necesidade a favor dos españois residentes no exterior e retornados.
2. Españolas de orixe galega, beneficiarias de axudas do programa 1 da Orde TAS 561/2006, do 24 de febreiro, pola que se establecen as bases reguladoras das concesións de axudas públicas correspondentes aos programas de actuación a prol das persoas emigrantes españolas non residentes en España que carezan ou non teñan cobertura suficiente desta continxencia.
3. Persoas de orixe galega ou descendentes de galegos/as ata o segundo grao e persoas españolas de orixe galega, non incluídas nos supostos anteriores, que acrediten insuficiencia de recursos mediante informe socio-ambiental, en aplicación dos criterios que se establecen no citado real decreto 8/2008 para a estimación de carencia de rendas e ingresos, e que precisen de asistencia médica especializada, incluíndo intervencións cirúrxicas.
4. Persoas de orixe galega ou descendentes de galegos/as ata o segundo grao e persoas españolas de orixe galega que estean en situación de dependencia pola súa idade, minusvalía ou enfermidade, entendéndose por tal aquela situación na que a persoa non pode facer, sen axuda, determinadas actividades da vida diaria que se consideran esenciais para o desenvolvemento normal da súa autonomía persoal, familiar ou social; esta situación deberá acreditarse mediante o correspondente informe médico.

### **Terceira.- Obrigas das partes**

1.- FUNDAOURENSE comprométese a:

- Prestarlles, previa identificación, ás persoas que reúnan os requisitos establecidos na cláusula segunda deste convenio, a axuda asistencial ou sanitaria demandada.
- Desenvolver actividades de carácter promocional, de estimulación e prevención entre a comunidade galega residente en Venezuela, co obxecto de detectar as súas necesidades e as persoas que precisen axuda.
- Prestar os servizos de axuda por persoal especializado, en función das necesidades e obxectivos das unidades familiares, dirixíndose prioritariamente aos supostos que presenten maior estado de necesidade.
- Dispor do equipo humano preciso para o desenvolvemento dos servizos, que contará en todo caso con traballadores/as sociais e persoal especializado para atender as persoas beneficiarias.
- Recibir as peticións para a súa avaliación e elaborar os informes socio-ambientais necesarios para a xustificación da correspondente situación de dependencia e necesidade do servizo das persoas solicitantes.

- Concertar con centros de persoas emigrantes españolas, de ser posible, acordos para prestar servizos de residencia destinados a persoas maiores ou de atención á calidade de vida.

Os expedientes coas propostas das persoas beneficiarias que se acollan aos programas amparados por este convenio, así como a contía individual imputada, serán elaborados por FUNDAOURENSE, aos que se acompañará un informe da situación individual de cada persoa beneficiaria, que xustifique a oportunidade de prestar o correspondente dereito ou servizo.

- Subministrar bolsas de produtos de primeira necesidade, alimenticios, hixiénicos, de aseo persoal, medicamentos, etc. (non serán atendibles con cargo a este convenio os medicamentos que se dispensen a través do programa medicamentos e servizos de saúde para os galegos e as galegas en Venezuela, concertado entre a Secretaría Xeral da Emigración e a empresa RESCARVEN, C.A.).

- Destinar os fondos que se perciban á execución do proxecto para o cal se concede esta subvención, executar as actuacións que constitúen o obxecto deste convenio e cumprir todas as condicións e obrigas recollidas nel.

- Comunicar de forma inmediata ao órgano concedente a obtención doutras axudas, subvencións, ingresos ou recursos para a mesma finalidade procedentes de calquera administración pública ou ente público ou privado nacional ou internacional, con expresión da súa contía. Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

- Remitirle á Secretaría Xeral da Emigración a información detallada acerca da súa actividade cando llo requira e, en todo caso, á conclusión deste convenio.

- Colaborar e facilitar canta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como someterse ás actuacións de supervisión e control previstas na Lei 9/2007, do 13 de xuño, de subvencións de Galicia e ás xerais derivadas da aplicación da normativa de axudas e subvencións.

- Actuar con suxeición ás obrigas sinaladas para as persoas beneficiarias de subvencións ou axudas públicas do artigo 11 da Lei 9/2007, do 13 de xuño, de subvencións de Galicia.

- Facer constar a condición de entidade subvencionada pola Consellería de Emprego, Comercio e Emigración en toda clase de publicidade e información que se realice ao desenvolver este convenio, así como os seus correspondentes logotipos.

- Facilitar a actuación do persoal técnico da Secretaría Xeral da Emigración no referente ao seguimento das actividades obxecto da axuda.

- Subministrarlle á Secretaría Xeral da Emigración toda a información que se lle requira en materia de transparencia, de acordo co disposto no artigo 4 da Lei 1/2016, do 18 de xaneiro, de transparencia e bo goberno.

2.- A Consellería de Emprego, Comercio e Emigración obrígase a:

- Achegar o importe do financiamento previsto na cláusula cuarta, condicionado ao cumprimento do estipulado no convenio.

#### **Cuarta.- Crédito orzamentario**

Co obxecto de colaborar no financiamento das accións recollidas neste convenio, a Consellería de Emprego, Comercio e Emigración comprométese a achegar unha contía de trinta mil euros (30.000 €), con cargo á aplicación orzamentaria 14.05.312C.481.0

(código de proxecto 2015 00039) dos orzamentos xerais da Comunidade Autónoma de Galicia para o ano 2025.

A contía da achega está destinada a sufragar os custos das obrigas derivadas do obxecto do convenio que se indican na cláusula terceira, así como os de persoal e de funcionamento regular das instalacións na medida en que sexan directamente imputables e contribúan ao seu cumprimento.

#### **Quinta.- Gastos subvencionables**

Consideraranse gastos subvencionables aqueles que, de xeito indubidable, respondan á natureza da actividade subvencionada e se realicen dentro do período comprendido entre o 1 de xaneiro de 2025 e a data límite de xustificación establecida na cláusula oitava, de acordo co establecido no artigo 29.1 da Lei 9/2007, do 13 de xuño, xeral de subvencións.

O custo de adquisición dos gastos subvencionables non poderá, en ningún caso, ser superior ao valor de mercado.

En ningunha circunstancia se considerarán gastos subvencionables os impostos indirectos cando sexan susceptibles de recuperación ou compensación nin os impostos persoais sobre a renda.

#### **Sexta.- Compatibilidade**

A obtención desta axuda é compatible coa obtención doutras axudas para este mesmo fin. A suma do conxunto das axudas solicitadas e/ou concedidas para o obxecto do convenio non poderá superar o 100% do custo da actividade que se vai subvencionar.

#### **Sétima.- Pagamento anticipado**

Tras a sinatura deste convenio efectuarase un pagamento anticipado de quince mil seiscientos euros (15.600 €), consonte o disposto no artigo 63.1.Un do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

O importe restante librarase no momento no que a entidade beneficiaria xustifique na súa totalidade o cumprimento da finalidade e demais condicións para as que se lle concedeu a axuda.

Por outra parte, á vista do establecido nos artigos 65.4 e 5 do decreto 11/2009, do 8 de xaneiro, por tratarse dunha entidade sen fin de lucro e ser o obxecto do convenio o desenvolvemento de programas de acción social, a entidade non está obrigada a constituir garantía.

#### **Oitava.- Xustificación e pagamento final**

A data límite para presentar a documentación xustificativa será o 15 de outubro de 2025.

A entidade beneficiaria estará obrigada a xustificar perante esta consellería, con carácter previo ao pagamento final da subvención, o cumprimento da finalidade da

subvención, a realización da actividade ou adopción do comportamento que fundamentou a súa concesión e o seu custo real mediante a presentación dunha conta xustificativa, de acordo co previsto no artigo 28 da Lei 9/2007, do 13 de xuño, de subvencións de Galicia e o artigo 48 do decreto 11/2009, de 8 de xaneiro.

A tal fin, a entidade beneficiaria deberá presentar a seguinte documentación:

- Certificación acreditativa na que se exprese que a totalidade dos fondos foron empregados na consecución dos obxectivos do presente convenio, asinada por quen represente a entidade.
- Memoria final detallada das actuacións levadas a cabo ao abeiro do convenio asinada por quen represente a entidade, na que se farán constar os obxectivos acadados, o orzamento total do funcionamento e o colectivo atendido.
- Relación clasificada dos gastos coas actividades e servizos prestados, con identificación do acredor e do documento, o seu importe, a data de emisión e a data de pagamento.

Copia dos documentos xustificativos dos gastos relacionados, tales como facturas e demais documentos de valor probatorio equivalente con validez no tráfico xurídico mercantil ou con eficacia administrativa, que fosen efectivamente pagados durante o período de vixencia do convenio e con anterioridade á data de finalización da súa xustificación. Todos os documentos orixinais de gasto deben conter o seguinte estampillado con anterioridade á realización da copia: Importe imputado ao convenio de colaboración asinado coa Consellería de Emprego, Comercio e Emigración da Xunta de Galicia de forma  total  parcial. Importe que se imputa ao convenio (en caso de imputación parcial): ..... €.


Os gastos de persoal xustificaranse coas nóminas ou, de ser o caso, con copia dos contratos de traballo e follas de salario asinadas pola persoa traballadora, onde quede plenamente identificada a función e o período de traballo realizado, e xustificantes de pagamento dos gastos sociais derivados.

Para os efectos da súa consideración como subvencionable, considérase efectivamente pagado o gasto cando se xustifique o pagamento mediante extractos ou certificacións bancarias debidamente identificados, selados e asinados pola entidade beneficiaria.

Os pagamentos en efectivo poderán ser admitidos nos casos debidamente xustificados por razóns xeográficas ou doutra índole, que serán acreditadas mediante declaración responsable do representante legal da entidade. Neste caso, a factura deberá estar asinada ou selada pola empresa ou entidade emisora e, ademais, deberá conter un selo que deixe constancia do devandito pagamento ("pagado", "cancelado", "en efectivo"...).

Excepcionalmente, se non puidese haber outro xeito de xustificación, previa declaración responsable deste extremo pola persoa representante legal da entidade, admitiranse recibos como documentos xustificativos dos gastos.

- De ser o caso, os tres orzamentos que se exigen en aplicación do artigo 29.3 da Lei 9/2007, do 13 de xuño, de subvencións de Galicia.
- Declaración responsable na que se indique o lugar no que están depositados os orixinais dos documentos xustificativos dos gastos e do seu pagamento así como o compromiso de presentalos cando sexa requirido polo órgano xestor.
- De ser o caso, a carta de pagamento de reintegro no suposto de remanentes non aplicados así como dos xuros derivados destes.
- Relación das persoas atendidas por FUNDAOURENSE con cargo a este convenio. Esta relación incluírá nome e apelidos, DNI, data e provincia galega de nacemento ou de orixe destas persoas, así como o tipo de prestación efectuada.



R.I.F.: J-309704

Antes de facerse efectivo cada pagamento chegaranse as seguintes declaracións:

- Declaración do conxunto de axudas solicitadas, tanto as aprobadas como as pendentes de resolución, concedidas para os mesmos fins que son obxecto deste convenio, das distintas administracións públicas competentes ou calquera dos seus organismos, entes ou sociedades ou de entidades privadas.
- Declaración responsable do cumprimento das súas obrigas tributarias e coa Seguridade Social e de non ter pendente de pagamento ningunha débeda coa Administración pública da Comunidade Autónoma de Galicia e de non ser debedor/a por resolución de procedemento de reintegro.

De non xustificaren o importe total da subvención obxecto do convenio, sempre e cando se tivese acadado o seu obxecto, a Consellería de Emprego, Comercio e Emigración minorará a súa achega proporcionalmente ao non xustificado.

#### **Novena.- Reintegro**

Procederá o reintegro, total ou parcial, da cantidade percibida cos xuros de mora devindicados desde o momento do seu pagamento, nos casos sinalados no artigo 33 da Lei 9/2007, do 13 de xuño, de subvencións de Galicia.

De acordo co artigo 14.1.n da lei 9/2007, os criterios de gradación dos posibles incumprimentos para determinar a cantidade que se deba minorar ou reintegrar serán os seguintes:

a) O incumprimento total dos fins para os que se concede a subvención, da realización dos gastos subvencionables ou da obriga de xustificación dará lugar á perda do dereito ao cobramento ou, se fose o caso, ao reintegro da totalidade da axuda percibida.

b) Calquera outra deficiencia considerárase incumprimento parcial dos fins para os que se concedeu a axuda, da realización dos gastos subvencionables ou da obriga de xustificación e dará lugar á perda do dereito ao cobramento ou, se fose o caso, ao reintegro na porcentaxe correspondente ao investimento non efectuado ou non xustificado.

#### **Décima.- Modificación do convenio**

Toda alteración das condicións tidas en conta para conceder esta axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación do convenio.

Tales modificacións do convenio adoptaranse por acordo expreso e escrito das partes asinantes e de acordo cos trámites que exixa a normativa vixente.

Así mesmo, o convenio poderá ser modificado unilateralmente pola Administración cando teña por finalidade o logro dos obxectivos de estabilidade orzamentaria e sustentabilidade financeira, de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico.

R.I.F.: J-309704



**Décimo primeira.- Causas de resolución do convenio**

1. Este convenio extinguirase polo cumprimento das actuacións que constitúen o seu obxecto ou por incorrer en causa de resolución.
2. Son causas de resolución:
  - a. O incumprimento total ou parcial dalgunha das estipulacións que o regulan
  - b. O transcurso do tempo fixado sen que se executen e/ou xustifiquen as actuacións obxecto da subvención ou sen se ter acordado a súa prórroga
  - c. O acordo unánime de todas as partes asinantes
  - e. Decisión xudicial declaratoria da nulidade do convenio
  - f. A aplicación dos fondos outorgados para fins distintos dos que motivaron a súa concesión
  - g. Calquera outra causa prevista nas leis.

**Décimo segunda.- Comisión de seguimento**

Coa finalidade de asegurar o cumprimento do convenio, crearase unha comisión paritaria que estará integrada por catro persoas, dúas en representación da Secretaría Xeral da Emigración, das cales unha exercerá a presidencia, e dúas en representación da entidade.

A comisión terá as seguintes funcións:

- a) Facer o seguimento e control do desenvolvemento do convenio.
- b) Propoñer a interpretación e a resolución das dúbidas que se poidan suscitar na aplicación do convenio.

Esta comisión actuará segundo o previsto no capítulo II do título preliminar da Lei 40/2015, do 1 de outubro, de réxime xurídico do sector público.

Con todo, serán resoltas pola persoa titular da Secretaría Xeral da Emigración todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida.

**Décimo terceira.- Relación laboral**

A subscrición deste convenio non implicará relación laboral, ou de calquera outra natureza, entre as persoas ou profesionais que desenvolvan as accións que constitúen o seu obxecto coa Consellería de Emprego, Comercio e Emigración ou con calquera organismo ou entidade dependente ou vinculada, de tal xeito que, por este concepto, non se lle poderá esixir á mencionada consellería responsabilidade ningunha, nin directa nin subsidiaria.

R.I.F.: J-30979465-5

Para a execución deste convenio, a Secretaría Xeral da Emigración, ou o persoal dela dependente, non impartirá instrucións nin ordes ao persoal contratado.

A Secretaría Xeral da Emigración poderá comprobar en todo momento o cumprimento por parte da outra parte das obrigas laborais e de aseguramento do persoal destinado a executar as actuacións obxecto deste convenio.

#### **Décimo cuarta.-Autorización, publicación e rexistro do convenio**

A sinatura deste convenio suporá o consentimento expreso das partes asinantes para incluír e facer públicos os datos persoais e o resto de especificacións que consten nel, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30, do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149, do 3 de agosto).

Comunicarase a subscripción deste convenio á Base de datos nacional de subvencións, que opera como sistema nacional de publicidade de subvencións, en cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións.

#### **Décimo quinta.- Natureza xurídica, réxime xurídico e xurisdición competente**

Este convenio ten natureza administrativa e queda fóra do ámbito da Lei 9/2017, do 8 de novembro, de contratos do sector público, que os exclúe expresamente.

Seralle de aplicación o réxime determinado pola Lei 9/2007, do 13 de xuño, de subvencións de Galicia; o Decreto 11/2009, do 8 de xaneiro, que a desenvolve; os preceptos básicos da Lei 38/2003, do 17 de novembro, xeral de subvencións e o Real decreto 887/2006 que a desenvolve; a Lei 1/2016, do 18 de xaneiro, de transparencia e bo goberno; a Lei 39/2015, do 1 de outubro, do procedemento administrativo común das administracións públicas; a Lei 40/2015, do 1 de outubro, de réxime xurídico do sector público, e polas demais normas de dereito administrativo aplicables.

As controversias derivadas da aplicación ou interpretación do presente convenio serán resoltas en última instancia pola persoa titular da Consellería de Emprego, Comercio e Emigración, cuxas resolucións poñen fin a vía administrativa. Contra eses acordos cabe interpoñer recurso contencioso-administrativo ante o Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

#### **Décimo sexta.- Vixencia**

Este convenio entrará en vigor o día seguinte ao da súa sinatura e estenderá a súa vixencia ata o 31 de outubro de 2025, agás que sexa denunciado por algunha das partes por incumprimento dos acordos que nel se recollen.

Porén, de acordo co artigo 2.1.b. da lei 9/2007, do 13 de xuño, as achegas económicas poderán financiar as accións necesarias para o cumprimento do obxecto do convenio realizadas a partir do 1 de xaneiro de 2025.

#### **Décimo sétima.- Protección de datos**

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos); da Lei orgánica 3/2018, do 5 de decembro, de protección de datos persoais e garantía dos dereitos dixitais; do Real decreto 1720/2007, do 21 de



decembro, polo que se aproba o Regulamento de desenvolvemento da LOPD, e demais normativa vixente de aplicación en cada momento en materia de protección de datos.

En proba de conformidade con canto antecede, asinan dous exemplares deste convenio, no lugar e data sinalados no encabezamento.

O conselleiro de Emprego, Comercio e Emigración



O presidente de FUNDAOURENSE



José Carlos Gómez Rodríguez



R.I.F.: J-30979466-5